

Иса Масихи би ждхана атин

1 Би ҳама рочан Румай падишаҳ Августус парман дат ки муччен мулкани мардум ки падишаҳиен вакай чера ант, баид ҳисаб байант. 2 Е авалиен мардумапи ҳисаби ат ки Куренис би Сурйа ҳакуми-а курт. 3 Муччен па вати намай нимистина би вати писс у пирукани шаҳра шутант. 4-5 Па ҳаме хатира ҳам Исуп ша Жалили валаиттай Насиратти шаҳра би Йақудйаи валаиттай Байт-Лаҳам намен шаҳра радаг бут ки вати у Марйами нама нимистаг бкант. Би Байт-Лаҳам Дауд падишаҳ баз вахт демтира пайда бутат у Исуп одина шут, паче ки а ша Дауди ранда ат. Марйам ки аи нами ат у вати лапа заге дашт, ҳам го аи шут. 6 А ки ода атант, Марйами загай дистинай вахт у муддат пура бут. 7 А вати авалиен бачакка дист, айра гирдикани таҳа патапт у би йакк авхуррай таҳа вапент, паче ки па аван би меманханаа жагае на ат. 8 Би ҳама ҳадд у гваран шванаг атант ки шапа би гйабана вати рамагана сатитант. 9 Нагумана Худаай парештаг ватра би аван нишан дат у авани ешк у ашк ша Худаай нура рошан бут. Шванаг би мазанен труссе каптант. 10 Парештаг авана гушти: «Ма труссит, паче ки ман па шма вашшен аҳвале авуртагун ки па муччен қавма мазанен шадие бит: 11 марочи Дауди шаҳрай таҳа шмай нижат дайок пайда бута ки Худаай Масих инт. 12 Па аи друст куртина аламатт еш инт: шма би гирдикани таҳа патаптаген загера ки авхуррай таҳа ваб инт, вади-а канит». 13 Нагумана аи панада асманиен парештагани беҳисабен лашкаре малум бут ки Худаа тарип-а куртант у гуштант; 14 «Шан у шарап па Худаа ки би арши ала инт, сол па заминай мардуман ки Худаай некен ваҳиг би авани сара инт». 15 Парештаг ки ша шванаганиа би асмана дур бутант, шванаг йакке адгара гуштант: «Бйаит би Байт-Лаҳам браван у ҳама вақиаана сайл бканан ки Худааванд аммара авани аҳвала дата». 16 Па шитабе шутант, у Марйама, Исупа у бачакка ки би авхуррай таҳа ваб ат, вади куртант. 17 Авана ки дистант, ҳабаре ки па загай бабатта гуштаг бутат, па аван накл куртант. 18 Муччен ушкинок ша ҳама ҳабаран ки шванаг па аван

накл куртант, хайран бутант. 19 Бале Марйам е муччен ҳабарана би
вати дилай таҳа жагир курт у сатит. 20 Шванаг бир гаштант у па
Худаа хамд у сана гуштант, паче ки а муччен чизана ушкитант у
дистант ҳама давл ки авана гуштаг бутат.